

春
秋
歸
義

春秋歸義摘要卷之三

獲嘉賀仲軾著

姪賀行素較

河北張縉彥

蘇門冀應熊訂

覃懷范印心評

東海范驤節

莊公

名同桓公子在位三十二年

元年春王正月

不書卽位穀梁以爲繼弑君不言卽位正也公羊以爲隱子也左傳以爲文姜出故也胡傳以爲內無所承上不請命也吾皆以爲未大魯莊遭桓公

之變正當卽位以示君臣之義獎率臣民灑泣枕
戈以報齊爲事卽位何害于義至于爲文姜出而
不忍卽位更屬私意若上不請命則春秋時十二
公之通罪又不當獨罪莊公且夫公穀左氏所言
者當日不行卽位之意胡傳所言者不行卽位之
理且謂繼而不書似乎原有是事而夫子削而不
書也有事而後可以見是非削之又誰知有是事
邪

三月夫人孫于齊

文姜

胡傳謂孫者順讓之辭使若不爲人子所逐以全恩也夫魯當國之臣不能責文姜久矣且魯不能讐齊又安能責文姜耶今而孫于齊者是姜氏之意也以其不安于心爲桓而去不比于歸寧故言孫非真逃魯而之齊也初時文姜身負大逆猶有懼心其後莊公爲之主國人無如之何屢會齊侯無復忌憚矣故孫齊乃責魯人之詞非所云全母子之恩也

夏單伯送王姬

左傳以爲送則單伯王臣也公穀以爲逆則單伯魯大夫也然魯之單伯不再見莊十一年王姬歸于齊亦魯爲主而無魯大夫逆文不應與此異同莊十四年單伯會伐宋疑卽此人則當以左傳爲正

周有單子見于經國語周有單襄公單靖公單穆公然則單氏蓋周之世卿也而魯之單氏無聞焉則單伯之爲周大夫無可疑者諸家必欲謂之魯大夫事無據

書送者對逆者而言之也昏禮必有逆者紀裂繻來逆女是也王姬歸齊有王人送而無齊人逆非不逆也不忍書也於此思之則春秋之責魯者至矣必以爲魯人逆殊失之甚矣

秋築王姬之館于外

杜云公在諒闇慮齊侯當親迎不忍便以禮接于廟又不敢逆王命故築舍于外

冬十月乙亥陳侯林卒

莊公卒子宣公杵臼立

王使榮叔來錫桓公命

此錫命之始

桓畢世無錫命則畢世非侯榮叔之命胡爲乎來
也是時齊新婚于王而禮成于魯故錫命于桓蓋
以慰藉魯也王此時已明知魯桓之不得其死謂
魯人不能忘齊故以錫命解釋之然則桓之篡齊
之殺皆王之所安而不欲問者也故王不稱天榮
叔稱字非敢貶王予榮叔乃畧其事也所以然者
錫諸侯命重事也重事而輕書之見王之自褻也
陳氏曰春秋之初亟書王人書來求猶有治不修
貢之事焉書來錫命猶治不稟命之事焉君子蓋

有感于此而非徒以爲譏也

王姬歸于齊

魯讐齊當在桓死之初告之天子請之與國魯之君若臣寢苦枕干共効同讐之義則是非當有所歸乃彭生之請除已遂桓公之錫命已來上下恬然安若無事故王不復以魯措意安然使魯主婚魯不復以齊措意欣然奉承王命齊亦不以魯措意坦然成其嘉禮魯自以爲尊天子結大國而不知齊人掩口笑之矣

畧齊魯之事而觀婚姻之禮則王姬于歸雍郁有
文寵之以王卿主之以列辟肅之以築館蓋若是
其嚴且重也此王化之基人倫之始春秋中人治
之大者不專爲魯也胡傳謂不書歸于齊則無以
見其罪之在是侯封之君重天子之女輕非大公
之論也

齊師遷紀邢鄆郛

三邑皆
紀地

魯方百里者五皆此類也有王者作在所損乎在
所益乎

二年春王二月葬陳莊公

夏公子慶父帥師伐于餘邱

邾邑杜註慶父莊公庶兄是爲仲慶父卽共仲

其後子孫以字爲氏卽仲孫氏之祖時人以其庶長稱孟故又謂之孟孫見春秋疏

兵力無餘不宜伐于餘邱兵力有餘不宜先于餘邱魯之忘齊直是不以爲讐非爲力不敵也蜀杜氏曰此大夫之專而出公子之文者蓋聖人病其不能復齊之讐目之以示義猶曰爲公之子而不能知君父之讐也

秋七月齊王姬卒

檀弓齊穀王姬之喪魯莊公爲之大功

卒王姬魯有事也于王姬厚矣厚王姬所以厚齊
有無父之國則可也

冬十有二月夫人姜氏會齊侯襄于禚齊地左傳書姦也

今日之會莫能禁之則前日之孫孰能迫之故知
如齊者是姜氏之志而以爲孫者春秋之文也姜
氏不悔罪狂行於國中魯人尙以彭生藉口乎

乙酉宋公馮卒莊公卒子閔公立高氏曰觀宋莊伐求敗類則穆公之不以國與子有以

知之矣

三年春王正月溺會齊師伐衛

左傳溺疾之也不能讐讐且與讐會師伐天子之所立至此而魯之人心盡亡矣爾于君父何有人亦于爾何有

夏四月葬宋莊公

五月葬桓王

爲天下主趙七年乃葬說者以爲王室多難然不嫁王姬乎沙隨程氏曰東遷之初尙有志于歸葬已而削弱益甚故于此始葬爲得其情不能歸葬而王室可知矣

春秋紀季以鄫入于齊邑

此小國迫于強暴不得已而爲存宗祀之計也可
哀也紀侯安季于齊而去國之志決矣此入齊也
可以爲難乎故知謂凡言入難辭皆非也歸入有
二義有乘隙而入者許叔小自陽生是也有自他
而附者紀季是也歸入同自外來而義各不同

冬公次于滑

鄭地林云此書次之始

左傳次于滑將會鄭伯謀紀故也君父之仇不量
力雖無援猶奮也苟能收紀以爲吾用魯有存亡

之誼紀切同舟之怒安在其不可爲也徒次焉是魯而已矣

四年春王二月夫人姜氏享齊侯襄于祝邱魯地

婦人享諸侯事奇齊侯越境享于婦人又奇季友

慶父皆桓公子醜顏受之殊所未解

三月紀伯姬卒

夏齊侯襄陳侯宣鄭伯遇于垂鄭伯三傳無文爲突爲儀俱不可考姑闕

之可也

紀侯大去其國

陸燦謂去有閔之之意焉是也然以大爲名非也
紀侯之去議者不一吾之所以原紀侯者謂其夫
人在殯齊師未加時猶可以盡然委而不顧者蓋
既不能守宗廟因不敢私葬子其志爲可哀也左傳

有大歸之文大
去原無可疑

六月乙丑齊侯

襄

葬紀伯姬

滅紀之役公羊以爲春秋賢齊襄復九世之讐也
然乎曰不然也紀天子之建國也齊卽讐紀亦讐
其子孫而已土地人民固不得而有也乃紀季入

于齊則受之紀侯去其國則舍之紀伯姬卒則葬之于紀之子孫無所問而惟紀之土地人民是利復讐固如是乎

齊襄何人而葬伯姬齊人葬伯姬而伯姬父母之國何在齊人之葬伯姬不受也齊人葬伯姬而伯姬之恨乃益深矣魯之爲國蓋是非羞惡盡亡而不復存者也

秋七月

冬公及齊人

襄

狩于禚

公穀云齊人者齊侯也

此齊侯也而書曰齊人春秋不忍對莊舉齊侯也
自是凡莊與齊襄同事俱不稱齊侯胡傳從穀梁
卑公之說非是

五年春王正月

夏夫人姜氏如齊師

胡傳曰會曰享猶爲之名也至是如齊師羞惡之
心亡矣夫婦人無外事曰會曰享可以爲名乎羞
惡之心何至今日而始亡也

秋郕犁來來朝

卽小邾子此
時尚未王命

冬公會齊人襄宋人閔陳人宣蔡人哀伐衛

齊襄烏獸之行凡人羞與爲伍宋陳蔡且與連兵
結黨犯天下之公惡拒天子之嚴命二百四十二
年之中未有亂于此時者也公羊傳云不言納衛
朔辟王也桓死之年莊公纔十三童蒙之子未可
責也故其罪魯之臣任之假令文姜悔罪齊襄歛
跡則國之大耻或有爲其母諱者乃會禚矣享祝
邱矣如齊師矣旣已成人而恬無羞惡之心且與
連兵伐國以抗王命不共之讐置之若棄姜氏無

夫莊公無父矣

六年春王正月壬子突救衛

林云書救始此自救衛無功王命益不行

于天

子突救衛天子有字小疾惡之心焉故書字貴之王救衛不能不爲天下笑乎不然也天下者王之天下救雖無功天下知有王也但王不能固守其義一救而遂置之爾

夏六月衛侯朔入于衛

王師救衛朔何人人衛苟非周天子之天下則已

不然者朔何所逃誅焉穀梁曰朔出入名以王命
絕之亦不必如此說凡諸侯失國歸國鮮有不名
者要之朔直是不當歸耳故不言歸見其以強力
抗天子也

秋公至自伐衛

去冬出今秋歸用力亦勞矣乃至自伐衛也公羊
得意致會不得意致伐之說非是

螽

以是時之天下論之君臣父子夫婦三綱絕矣時

事之所急蓋有重焉者何有於民然螟則必書聖
人之心蓋無時而不念小民之依也苟無民卽三
綱無所托矣

冬齊人來歸衛俘

左傳齊人來歸衛俘
賈文姜請之也

當是時諸侯所爲絕君臣父子而力圖之者此而
已桓之郤鼎莊之衛寶父子一揆也

魯與齊同伐衛同抗王師同納逆侯暴師經年用
力亦勤矣乃寶爲齊人所得魯僅分其棄餘則不
但齊無魯衛惠亦無魯矣是魯不但不能爲義亦

不能爲不義見輕若此何施面目胡傳但知罪其有欲貨之心而不知魯無貨之可欲也

七年春夫人姜氏會齊侯

襄于防魯地

夏四月辛卯夜恒星不見夜中星隕如雨

左傳恒星不見夜明

也星隕如雨與雨偕也非也當以公羊爲正星隕如雨衆也故以爲異

夜明星雨變異之大者此有天下者之憂也

秋大水無麥苗

災異與天修救與人民以食爲天未可委之爲適然之數也

冬夫人姜氏會齊侯襄于穀

於是以會爲常齊魯不耻士民不異如此而不亡者自古無之

八年春王正月師次于郎以俟陳人蔡人

師曷爲而次于郎邪魯有師也有師而不用之於仇讐不用之於保境安民而用之於親讐以伐同姓之國蓋至是而魯亦爲陳蔡所輕矣輕之故不至徒俟之不亦無顏乎

甲午治兵

見輕於與國我之士卒亦解體矣強爲整旅亦何振之有

夏師及齊師圍郕

以伐國論之師必有期安有暴師逾期以千乘之君輕身待讐人之命於境上彼齊人者從容自如至夏師始出不知魯之君臣何以安爰

郕降于齊師

次于郕爲伐郕郕人知之矣俟陳人蔡人不至郕人知之矣暴師不退以專爲郕郕人知之矣圖郕

者我也受邾者齊也玩魯如嬰兒益不獨一齊爲然矣

秋師還

自春正月以至於秋暴師於外不義而動疲衆而歸一年經營捐我同姓之圖益恃齊之強而已故不稱公醜之也稱師恨之也有滅國之師而無父子之意魯且如莊何胡傳師爲重義繫於師故不書公非是

冬十有一月癸未齊無知弑其君諸兒齊襄

無知不稱公孫是篡國之詞徒人費石之紛如孟

陽皆捐軀死難或以方之齊莊之賈舉州綽等非也賈舉州綽諸人乃不得不死是格鬪而被殺者也徒人費諸人乃可以不死不肯避死以求全其君者也食焉而不避其難費等有焉然而不爲春秋所錄者何也蓋小人服役于亂君非有事君之義不足爲國家輕重故春秋畧之未必皆逢君之惡者胡傳責之太過

九年春齊人殺無知

無知之使連稱從妹間齊侯其包藏禍心久矣然

不旋踵而見殺則亂賊亦何益乎然曰齊人殺無
知則千乘之主見弑等于狗彘而莫之恤亂臣賊
子奈何不接踵于世乎

無知之逆天子不問諸侯不討苟非春秋明正其
罪天下萬世亦安知齊無知之弑其君邪何也史
散時遠則事難稽齊襄淫暴不臣議又易淆也有
春秋而是非始定無知之罪始明此所以春秋成
而亂臣賊子懼也或曰無知不爲雍廩所殺乎亂
賊何嘗逃死曰齊人殺之耳非天討也彼且以爲

適然之不幸而未有所懲也胡傳謂人者衆詞所謂亂臣賊子人人得而誅之夫謂人人得而誅之是也謂人人誅之皆能討賊非也不然則凡弑君者有幾人不見殺乎

公及齊大夫盟于蔣

魯地

魯莊卽位于是九年無歲不以齊爲事大夫之盟是亦不可以已乎偏好親讐雖齊人淪盟不耻汲汲若狂是其性與人殊也

夏公伐齊納子糾

公殺云無子字糾不稱齊不與公納齊子糾也

糾白二人之事議者紛紛或謂爲昔僖公子或以爲皆襄公子或以糾爲兄或以桓爲兄欲文致一人之罪而牽強附會殊令人可厭凡事可以理斷如爲僖子爲襄子則隔世次或爲弟或爲兄則分長幼此可以臆決乎春秋舉事論大義書公則事爲莊之事是非莊任之安有魯莊而可以與知齊難乎公伐齊納糾是爲有意安定讐人之國家乃莊之大罪也其所以旣盟而又伐之故及糾之應稱子與不應稱子皆不必論也卽就齊事論之糾

白皆非應立之人爭立皆爲可誅不得已而論其次則以能安國家者爲貴其爲長爲少爲兄弟非兄弟可不必論也必欲定二人爲某公之子某兄某弟吾以爲皆第二義也

齊小白入于齊

入者自外奔趨之詞國亂無主人有競心此方納而彼已入得則爲之而已矣內無所承上不請命侯國弑逆不聽斧鉞于天子不俟錫命于王朝諸公子乘隙爭竊欲納則納欲入則入捷足者則得

之以此言之則糾白又何長幼之可言程子謂稱
齊小白明當有齊則齊無知齊陽生豈亦當有齊
邪故書納子糾者不欲公納讐國之子也書齊小
白入于齊見齊猶有爭國之公子公之納可已而
不已也

秋七月丁酉葬齊襄公

九月乃葬

以諸侯葬則亦葬之而已矣公羊疏謂痛賢君不
得以時葬豈以齊襄之淫拒王師納逆朔戕魯桓
爲賢乎好惡拂人之性無甚于斯言

八月庚申及齊師戰于乾時我師敗績

乾時水名齊地

小白入齊齊已有君又可以爭乎必欲爲不義之戰以快一逞竟以取辱名實俱喪無如魯莊者沒公不書深耻之也自是而齊魯之怨成矣

九月齊人取子糾殺之

賈逵云稱子者愍之沈云齊人稱子糾故魯史從其所稱

而經書子糾傳云子糾親也請君討之豈復是愍之乎此言是也故子糾如子儀子適之類只是名耳非稱之爲子也

春爲蕲之盟夏爲齊之伐秋爲乾時之戰九月齊人取而殺之穀梁曰十室之邑可以逃難百室之

邑可以隱死以千乘之魯而不能存子糾以爲公
病矣此言是也君子之于人也力能庇則庇之力
不能庇則辭之旣庇之而又殺之獨無疚于心乎
管子天下才也魯之爲糾又甚力當齊亂未定借
魯立糾宜有餘力乃旣不能乘機定糾又不知魯
之不足以庇糾束手觀望殆不可曉豈時未至雖
豪傑無所用其才邪抑亦度糾不足與有爲且念
鮑叔有成言故不肯盡死力乎

冬浚洙

浚洙者畏齊也伐齊之氣安在魯之謀國者何人
可憐哉

十年春王正月公敗齊師于長勺

魯地

公敗齊師內勝之詞也兩軍角力而有勝負則書
敗其常也隱十年公敗宋師于菅穀梁曰內不言
戰舉其大者是矣魯爲齊殺糾畏齊浚洙氣靡
色喪遂致強敵壓境賴有此戰庶幾得以顏色視
國人耳雖然爲國不得其道雖能敗強敵如齊桓
猶之無當也此春秋微意胡傳乃謂善爲國者不

師而以詐謀取勝爲譏夫救國之患惟力是視齊人三鼓兩刃相接可以詐爲譏乎戰之是非在致戰之前不在兩陳相搏之頃也以齊之強小白之爲君也而魯能敗之况執大義以討齊襄何患不克有甲兵而無父子是春秋之所隱恨于魯莊也

二月公侵宋

侵宋傳不言其事考之於經宋者是莊五年所與同伐衛之黨也此之侵非爭小忿則貪小利時齊怨方新又無故而啓宋之釁嗟乎世之人以利交

者未有不以利踈獨一宋魯爲然哉

公侵宋無益之師也內疲其民而外無損于敵以是爲公病矣徒使伯者因之以爲資可謂愚也已

三月宋人

閔遷宿林云此遷國之始

遷者迫逐之詞天子不能有其建國強凌弱衆暴寡小國相率以淪于亡可勝誅哉

凡諸侯兼併小國以爲強也而君子惡之謂其所爲強者非其所以強者也立國之道禮義而已矣棄禮義而恣淫虐如宋殤亟戰焉而死齊襄滅紀

焉而死宋閔遷宿焉而死衛惠抗王焉而子孫宗
廟屠戮于狄人數君之所爲非以召亡也數君之
取亡亦非以虐小也不仁不知無禮無義是其亡
之本也彼宋襄者是又慕仁義而失之非仁義之
罪也

夏六月齊師

桓

宋師

閔

次于郕公敗宋師于乘邱

魯

敵未陳曰敗某師傳有是言矣此繹敗敵之義耳
非謂敵未陳必不可敗也敵之假我之利也曾以
是爲譏乎且旣成師以伐人無時不當戒懼今不

罪不整取敗者而專責用詐敗人者有是理乎

傳

在十一年

疆場之事一勝一負負者不足論勝者亦未可恃也前敗齊師于長勺今敗宋師于乘邱魯之兵力何嘗不加于齊宋然齊之伯氣方新魯之服從伊始則戰勝之威安在邪有千乘之國而不知所以用之聖人以爲魯病矣

秋九月荆敗蔡師于莘以蔡侯獻舞歸

左傳息嬀過蔡蔡侯止而

見之弗賓息侯怒謂楚伐蔡以獻舞歸林云此書荆之始亦荆猾夏之始

荆一入中國而執侯服之君如孤雛腐鼠天下之
亂于是極矣此後齊桓九合諸侯召陵服楚中國
始有禮義夫子曰一匡天下豈不信哉

此荆憑陵中國之始獻舞以侯服之君執辱于夷
故名葦賤之也此夷夏之大變春秋所憂也胡傳
謂逃猶有耻焉荆師奄至期于能守不能守而見
獲非得已也

桓二年蔡侯鄭伯會于鄧傳曰始懼楚也至是蔡
侯竟爲楚所執三十年之預防不能當荆人之一

戰從來有空文而無實事者未有不至于決裂也

冬十月齊師滅譚譚子奔莒

林云此滅國之始

王氏經世齊桓圖伯之初滅譚滅遂降鄆專以威力虐小侮弱其後雖能存三亡國功不足掩罪矣春秋書荆敗蔡師以蔡侯獻舞歸齊師滅譚譚子奔莒荆之所爲齊亦爲之此責齊桓是也

十有一年春王正月

夏五月戊寅公敗宋師于鄆

魯地左傳宋爲乘邱之役故侵我公禦之宋師

未陳而敗之

宋以私怨侵鄰魯以積怨召侮皆誅也僥倖于一
勝非所貴也時齊方圖伯宋魯不修德義自強乃
爲不義之戰而兩歸其利于齊是可嘆也書曰戰
伐之事聖人所重且見宋魯兩大國其所圖維者
如此而已謀國有道兩君不知宜其役于齊也

秋宋大水

書鄰之水以示相關之意莊能弔之猶有古意苟
能推廣是心則患難相恤豈但不相侵伐亦何强
暴之敢凌

冬王姬歸于齊

十有二年春王三月紀叔姬歸于鄫

紀亡矣紀侯亦亡矣叔姬不安于父母之邦而歸
死于鄫不但婦道之始終全殆深有恨于魯乎是
故終紀侯之世而歸于鄫書歸于鄫嘉之也隱之
也

夏四月

秋八月甲午宋萬弑其君捷及其大夫仇牧

閔公弑桓公御

說

仇牧非必能勇也義形于色不顧其死食焉而不
避其難牧無媿焉足以愧人臣之臨難苟免者不
必謂其生而存足以制逆萬之死命也

宋督仇牧皆爲宋萬所殺經削督不書是知春秋
予牧也杜謂其不警遇賊無善事可褒非是

王氏曰左氏宋公相斲之後萬病其言而肆惡古
者賢君待其臣以禮出入起居罔有不欽則戲謔
之設意外之變何由至哉閔公反此所以及禍也
冬十月宋萬出奔陳

出奔陳陳爰之也夫獨非君乎何爰于亂賊而庇之至于得賂然後歸罪人衛石祁子曰天下之惡一也惡于宋而保于我保之何補得一夫而失一國與惡而棄好非謀也至言哉

殺宋萬不書胡傳以爲著陳人與賊爲黨之罪汪氏謂以狙詐殺之非天討吳臨川謂賊遁去後始得而誅之視石碯討州吁之義則有愧矣夫陳人爰萬其爲黨賊所不待言但書出奔陳則陳罪已見至萬之遁于陳視州吁之從容如陳謀朝王不

有問乎石碯之告宋人之請一也其必用賂而後
得則陳人之罪爾宋何以愧于石碯姜鳳阿又謂
胡傳少責國人一意亦所未喻宋萬旣弑又立子
游又用師圍亳其勢亦非易取宋人能破其師殺
其所立視衛人甘心奉戴州吁不啻懸矣萬之出
奔蓋力足以逸而去之非宋人故縱之也請于陳
而戮之宋人之義完矣不書宋人殺者所以免宋
人以存天子之刑章也

十有三年春齊侯

桓宋人

桓

陳人

宣

蔡人

哀

邾人

儀

父

會于北杏

齊地林云衣裳之會一序齊于諸侯之上謂魯始伯之詞自是無特相曰者矣

齊侯何以書爵正其能會諸侯也夫子曰桓公九合諸侯不以兵車此會是也諸侯會所當會何以稱人諸侯無周外矣有伯者出而後聽命之不遑故不得與齊侯等同列之尊也同爲方岳不能恪共王命而俛首聽命于人所謂人役也書人以賤之非謂其不當爲此會也嗣是而單伯會伐矣天下始知有天子之討又嗣是而單伯會諸侯矣天下始知有天子之尊此齊桓所以一匡天下不獨

服楚也

會而不盟莫敢不服不足與盟也諸侯有背者吾得執義而問之亦不賴盟也此齊桓所以制服諸侯而成伯者之事也諸侯有愧色矣

夏六月齊人滅遂

王伯何以辨王者覆冒無外利天下而不私焉伯者以力服人而自爲吾力所不能兼則挾之以爲名會盟之諸侯是也彼力所不能抗則剪之以爲利譚遂諸小國是也孟子曰以力假仁者霸夫有

一毫爲人之心此伯之所以可惡夫子取之亦聊爲其能存王耳非得已也

秋七月

冬公會齊侯

桓

盟于柯

林云曹刿劫盟

會而盟之猶有敵國之禮焉諸侯不能得之于桓而齊侯不能拒之于魯嗣是而桓復爲盟蓋以文祝柯也是役也曹刿劫盟齊桓氣懾一劍之任賢于十萬師臣之係于國家豈輕也哉柯盟之誦視長勺之詐何如康侯獨不以爲譏何邪

十有四年春齊人

桓陳人桓

曹人莊

伐宋

左傳宋人背北杏之

會諸侯伐宋齊請師于周夏
單伯會之取成于宋而還

宋人背北杏之會伐之是也諸侯何以稱人春秋
蓋傷王法之終不復伸于天下也何也齊桓者伯
諸侯而尊天子者也北杏之會伯者之勢已定此
後奉天子以行事必有赫然其可觀者乃搜諸侯
以伐諸侯不過背會之宋人伯亦奚取焉胡傳謂
其稱人爲將卑師少是以制用兵而賦民薄方伯
之國事不涉于天子雖兵有制而賦民薄何關于

天下之義而春秋取之邪春秋之取伯凡以爲王也故北杏之會嘉其能督率諸侯伐宋之役譏其先已私而忘天子

夏單伯會伐宋

林云于是諸侯初用王師

伐宋非王所急也然而單伯會之者蓋以應伯臣之請也郭子儀請補一吏不得以爲上待我厚不疑我使王乘桓初起與之共明大義桓方尊天子而內有所主外盡其力其功烈必有可觀惜也王不自主而待意于桓王伯異道可嘆也夫

單伯之會伐何以無譏曰北杏之會桓之所以爲伯也宋人背之故齊桓得藉口于公義而挾諸侯假王命以伐之春秋亦姑以其名爲存王之用蓋自子突救衛無功王師喪氣齊桓假單伯于會以示天下之有王功亦不可泯也自隱桓以來王室日卑以空名寄天下者恃此耳

秋七月荆入蔡

左傳蔡哀侯繩息媯以誚楚子楚子滅息以息媯歸生二子未言楚子問

之對曰吾一婦人事二夫縱弗能死又奚言楚子以蔡侯滅息遂伐蔡七月葬入蔡

息侯以蔡侯慢其妻而導楚伐蔡蔡侯以息侯執

其身而誘楚滅息。息嬖又爲息侯恨蔡而激楚人。蔡蔡息以婦人覆國。楚人以婦人伐國。此所以爲夷也。季氏私考謂蔡者楚所由病中國之要道。苟非得蔡不能長驅中原。此天下之大形勢。其論甚善。但楚夷此時未必卽有大志。且伐宋伐鄭伐許伐陳不聞。皆假途于蔡也。

冬。單伯會齊侯。

桓

宋公。

桓

衛侯。

惠

鄭伯。

厲

于鄆。

衛地。林云。

大宴之會。二此諸侯會王臣之始。

以此會徵單伯。決是周大夫不然。魯安敢以大夫

會伯主而安坐自尊邪

左傳是年鄭人殺子儀經削而不書是故苟不當

立雖竊位十四年春秋不書也然則突無不書豈

予之乎突有諸侯之事焉春秋雖欲削之不能也

十有五年春齊侯桓宋公桓陳侯宣衛侯惠鄭伯厲

會于鄆齊桓之會三

王臣主會而來同之義著諸侯會伯而伯主之體

成

夏夫人姜氏文如齊

姜氏之罪不容于死桓卽私親不能爲伯討亦不當訓正之乎

秋宋人

桓

齊人邾人

儀

伐郕

伯主之舉事有權不徒藉王之名已也如郕之伐所謂權也傳曰諸侯爲宋伐郕是伐郕宋志也齊因徇宋之意而爲之伐之爲宋伐郕者正陰收宋使附己也收宋所以收諸侯也臧文仲曰與人同欲盡濟此類是也胡傳謂未成乎共爲伯則于伐郕之意何居

鄭人侵宋

宋鄭冬春再會而秋侵之何以會爲突與宋故有怨伯主方聯異爲同合諸侯以尊天子鄭人忘兩會之好復尋兵以解成約猶隱桓之世故態此見人心習於怙亂而伯之經營不易爲力也鄭突以篡得國法當首治齊桓不能倡明大義釋其重罪而彼反修其小隙殆所謂當斷不斷反受其亂者邪

冬十月

十有六年春王正月

夏宋人

桓齊人

桓衛人

惠伐鄭

林云齊楚爭鄭于是始

鄭人背會好侵宋其心固有不齊齊桓首治諸侯之不率者則伐鄭乃齊事猶以宋主兵此齊桓收宋猶鄭志也猶之用師也不能聲罪致討而大義不光矣

秋荆伐鄭

人蔡不已又禍申于鄭荆之勢益火燎于原矣荆懲又安可已也

冬十有二月會齊侯桓宋公桓陳侯宣衛侯惠鄭伯

厲許男滑伯滕子同盟于幽宋地左傳鄭成也林云衣裳之會四齊桓初主

盟也自是無特相盟者矣

會不稱公胡傳以爲諱之惡失信也杜註以爲微者皆非也北杏之役會而不盟鄆之會亦然其時齊桓始得諸侯未知諸侯與之否也至此則諸侯漸已懾服于是大合諸侯而同盟焉同盟者諸侯同心以尊伯主也于是伯勢始張羣天下之君侯而稟成于伯主浸尋之極至于列辟之尊而稽首

于伯庭此一會也大合諸侯君臣變常之始卽桓
之初心亦不知其遂至于此也勢也春秋傷之故
殊公不書乃春秋筆削之大而存周之至情也此
見非常之事非人臣所得專有伊尹之志則可也

邾子克卒

儀父卒邾子頃立自隱公元年人春秋至是四十五年

十有七年春齊人執鄭詹

左傳鄭不朝也

諸侯有相朝之禮况伯主乎鄭敢于不朝安可不
問但鄭突負篡逆之罪舍之而不討發怒于不朝
是謂舍其大而誅其細故曰齊人執鄭詹病失之

丁始也

夏齊人殲于遂

秋鄭詹自齊逃來

鄭詹不能以義懾齊人又不能守死不屈倖逃苟
免以爲國羞故書逃以懲人臣之不知耻者但詹
不足論也魯之受詹則未爲非也胡傳乃謂其首
叛盟而受其逋逃爲虧信義不亦過乎

冬多麋

桓莊之世無歲不有外事民力何得不困而又多

廉害穉其何以堪故志之

十有八年春王三月日有食之

不書日

不言朔不言日穀梁以爲夜食近之

夏公追戎于濟西

左傳不言其來諱之也杜云戎來侵魯人不知去乃知之故諱不言

其來林云魯始治戎

邇臣不戒敵至不知以爲國禍千古一揆可恨也
公追戎虜公也以方岳之重親與犬羊從事于車
馬之間雖勝不武矣血氣之勇非所以爲國也

秋有濟

短氣也舍汝射人爲災水中淫獸音或廣韻音或鄭穎濱曰生于南方魯之所無凡稱有

也

乖氣致異災未有無因而至者求其端而謹之可也

冬十月

十有九年春王正月

是年王室有子頹之亂衛師燕師伐土止于頹王處于櫟

夏四月

秋公子結媵陳人之婦于鄆遂及齊侯

桓宋公桓盟

媵陳人之婦細事也盟諸侯重禮也媵陳人之婦

者可以盟諸侯乎且幽之盟口血未乾此又何以

盟爲毋亦以受鄭詹之逃有不釋然于心乎不然
此媵微事何書焉卒之無益于事而失好啓釁不
亦拙乎春秋之所責于魯者不能强于義而受驅
策于齊若此盟者所謂不能以義自信其是非不
足言也胡傳專責遂事之非未深合經義也是役
也齊宋以爲不可則如勿許既許之盟而又伐之
何居

夫人姜氏

姜如莒

婦人無外事父母不存雖父母之國不得歸寧况

異姓之國乎襄桓既死姜猶不戢魯之閭門如此
奈何欲抗顏於列辟乎

冬齊人宋人陳人伐我西鄙

稱人非大眾也稱西鄙非深入也所謂薄示之警
使之自謀而來也魯于是乎爲諸侯所輕矣

二十年春王二月夫人姜氏如莒

夏齊大災

杜云大火曰災

春秋記災異不獨記魯而兼及各國聖人謹凜于
天人相與之際畏天之威不敢以鄰邦而忽之也

公羊傳云大災者何大瘡也何以書記災也外災
不書此何以書及我也雖論災與左氏不同但
之災未爲異也而何休詳及魯任鄭詹文姜淫宮
齊桓內淫之事以爲感召所致所謂強作解事者
邪

秋七月

冬齊人伐戎

林云齊始治戎

時王室方有子頽之難齊舍之而伐戎余初謂其
勤兵于不急之地以爲燕討由今思之殆非也魏

春秋歸義

卷三 莊公

三十一

絳曰戎狄事晉四鄰振動諸侯威懷凡懷伯王之
遠畧未有不欲修兵力之有餘者戎之伐殆亦魏
絳之意乎時桓新得諸侯戎狄未賓楚人方訐桓
力未能及楚故且先求制戎以張其威非爲燕也

二十有一年春王正月

左傳鄭虢晉命于盟夏同虢
王城鄭伯將王自圍門入虢

叔自北門入殺王
子頹及五大夫

夏五月辛酉鄭伯突卒

厲公卒子
文公捷立

是時王室有子頹之亂齊桓不問鄭虢乃能平定
王室執燕仲父殺王子頹差足快人意天子既受

其功聖人不得不寬其罪是故法不亟行後有功則難議罪功不亟賞後有罪則難議誅古今之通患也

鄭虢內靖王室之難外銷伯國之謀可以爲大功經何以不書曰鄭突奸人之傑者也其心未肯屈服于桓故鄭之會纔罷而侵宋之師興及鄭詹以不朝受執而力小無如齊何故亦自合虢以靖王室蓋欲以是抗桓非真能爲王也春秋以爲事公而心私故削而不錄不然鞶鑑之賜王寵也不能

懷寵保功而且以是惡于王則其心居然可知矣

秋七月戊戌夫人姜氏薨

文姜

冬十有二月葬鄭厲公

八月葬

二十有二年春王正月肆大眚

赦者君子不得已而用之如大兵大荒大亂大疫
之後小人之情或有可矜而霜雪之後不妨更始
間一行之可也若無故肆赦是爲惠奸君子不取
也

癸丑葬我小君文姜

程沙隨曰婦人之諡從夫文姜別作諡以其得罪于先公此說是也文姜之事魯人之心未嘗不明然而不能斷者莊公難與言也自是婦人遂以別諡爲常矣

陳人殺其公子御寇

杜云陳人惡其殺太子之名故不稱君父以國討公子告

左傳御寇太子也曰陳人殺之則非君意可知衰亂之世君不能有其子變之大者也

夏五月

林云無事以首賄書者五十九惟此書五月昭十年書十一月左氏無文

秋七月丙申及齊高傒盟于防

魯地

結不宜盟齊侯而盟之則辱齊公不宜盟高傒而盟之則辱已後之盟結爲之也結不爲鄆之盟傒又安有防之盟哉故曰君子慎始

冬公如齊納幣

二傳云親納幣非禮也而況于娶讐女也

二十有三年春公至自齊

齊豈莊之所宜至邪

祭叔來聘

以祭叔敵公尊崇天子之義也此與凡伯南季渠

伯糾仍叔之子家父王季子不同者彼施于所不當施故稱王稱王者見其出于一人之私意所以病其失此則修常禮耳可不言使也若是私交經亦當不以聘禮書之春秋不以禮假人

夏公如齊觀社

千乘之君棄尊處褻有如兒戲謂國家何程子謂昏議尙遲故公以覲社爲名再往請議後一年方逆葢齊難之亦是想當然耳卽如所云亦非所以爲名矣曹劌之言曰諸侯有王王有巡守以大習

之非是君不舉矣其不欲公之屈于齊也此其爲
臣豈甘爲人下者乎惜乎莊不足與有爲也

公至自齊

荆人來聘

經有卽事以見是非者有是非在記事之外者如
荆人來聘是其一也荆人之罪在于猾夏僭天子
藩封之臣在于內尊王室外威戎狄若其來聘不
過交往之常蓋是非之所不及焉然而書之者楚
人忘其強僭之罪而敢狎諸侯魯人忘其尊攘之

義而受其使節皆罪也故經書荆人來聘而畧其
君臣以示斥遠之義則魯可知所謂是非在記事
之外也胡傳乃謂聖人嘉其慕義故進之何所見
之小也于此見宋人之易與而北與遼講兄弟之
好西與夏結父子之歡浸尋之極以至于稱臣奉
貢而不耻蓋皆樂與人爲善之說爲之流禍也

公及齊侯遇于穀

齊地

蕭叔朝公

劉氏曰爲禮非其時猶非其禮也爲禮非其處猶

非其禮也爲禮非其義猶非其禮也九月郊五月
烝此之謂非其時蕭叔朝公伯姬會洮此之謂非
其處伯姬朝子齊侯來獻捷此之謂非其義雖有
肅敬之心繁飾之容而君子不受也故禮非其禮
而猶不受必歸之正而止

秋丹桓宮楹

冬十有一月曹伯射姑卒

莊公卒子
僖公夷立

十有二月甲寅公會齊侯盟于扈

鄭地

胡傳引程子之言謂遇于穀盟于扈皆爲要結盟

好也夫公已納弊婚姻已定又安用要結如謂齊人有疑則桓不欺曹柯之盟而欺公之婚乎且公之觀社遇穀納弊盟防其示齊之輕也久矣又何疑焉故扈之盟瀆詞也而莊書之姑以存體焉爾彼謂桓盟不日而於此又不能通公羊以爲危之范甯以爲慶之皆不規於義也

十有四年春王三月刻桓宮桷

丹楹刻桷惟恐不麗後死父之飾以美譬女之觀莊不類泚乎一書再書甚之也

葬曹莊公

夏公如齊逆女

秋公至自齊

婚禮人道之始有常禮有常期如魯莊者直以爲私親之樂耳夏迎秋至不爲不久而又不與夫人俱至所謂如齊親迎者何人不正其始能要其終乎

八月丁丑夫人姜氏入

哀姜

姜氏入悍詞也譬女廟見其謂先君何

戊寅大夫宗婦覲用幣

戊寅大夫宗婦覲是大夫宗婦同覲也用幣是大夫宗婦同贊也事兩失禮矣

大水

冬戎侵曹

曹羈出奔陳

赤歸于曹

經書羈赤之事似與鄭之忽突同然左傳無明文不可考也

郭公

曹郭之事傳記不同缺之可也

姜鳳阿事義全考云桓公始伯嘗一伐戎而戎侵
曹不能制故戎制諸夏廢置人君亦以病齊桓也
二十有五年春陳侯使女叔來聘

夏五月癸丑衛侯朔卒

子懿公立

衛朔不書葬春秋削之也凡以侯葬者雖有罪必
書衛朔非侯也抗王自立誰授之爵而可以侯葬
之乎然則何以稱衛侯其以侯接諸侯也諸侯侯
之國人侯之聖人安得而不侯之朔之非侯未可
以口舌爭而其實不可假也故于葬而削之

六月辛未朔日有食之鼓用牲于社

夏之四月所謂正陽之月也傳曰非常也唯正月
慝未作日有食之于是乎用幣于社伐鼓于朝
鼓陽氣也言充其陽也刑牲則陰矣非助陽之道
也用牲小失也而書之者見君臣無真正修省恐
懼之意

伯姬歸于杞

秋大水鼓用牲于社于門

傳曰亦非常也凡天災有
弊無牲非日月之眚不鼓

冬公子友如陳

林云內大夫出聘之始杜云報女叔之聘諸魯出朝聘皆書如不果彼國必成其禮故不稱朝聘春秋之常也公子友莊公之母弟稱公子者史策之通言

二十有六年春公伐戎

是時魯無戎禍而齊方剗霸然則勤兵于遠是亦可已而不已者也

夏公至自伐戎

曹殺其大夫

此殺大夫之始

穀梁曰大夫而不稱名姓曹無大夫也按王制曰
大國三卿皆命于天子次國三卿二卿命于天子
一卿命于其君小國二卿皆命于其君是也然則
其君可以專命者不可以專殺乎曰非也不專殺
大夫者所以崇大夫也且皆命于其君者天子命
之命也是亦天子命之也受命于天子以有其大
夫而專殺無忌是小國無王章也蔡邱之令曰無
專殺大夫但既曰大夫卽不可專殺未嘗分別命
于天子與否也

春秋左傳卷之二十一
秋公會宋人齊人伐徐

胡傳曰戎與徐合兵爲魯患此蓋以春伐戎臆度之耳兵革相尋何日之有非君子之急務也是時齊桓主中國而序宋于上者此見齊桓順適諸侯之意猶伐邲之心非君子大居正之道也

冬十有二月癸亥朔日有食之

二十有七年春公會杞伯姬于洮

魯地

屬詞伯姬以前二年歸杞至此會公于洮冬乃歸
字皆爲杞伯來朝之地也亦臆度之詞耳新婚之

國何遂至于不得朝而煩婦人乎卽云爾亦但有
伯姬歸寧請之耳安能屈公至洮乎總之婦無外
事有事于洮杞魯皆失不足深論也

夏六月公會齊侯

桓

宋公

桓

陳侯

宣

鄭伯

文

同盟于

幽

衣裳之會五于是衛不同矣故知凡同者皆指其見在者而言之也非大同也

同則有不同矣桓以尊周爲名而諸侯有不同焉
則伯亦愧矣威力不可以要其終有如此

秋公子友如陳塋原仲

左傳非禮也原仲季友之舊也公羊云避內難也穀梁云

齊出奔也

以左氏則譏也以公穀則有托而行也季子賢者
未應違禮公穀之說殆有所本與春秋書之其微
詞以著魯之亂乎

外大夫不卒內大夫專行違禮者俱去族如輦溺
是也今友稱公子原仲稱字絕無貶疾之意故知
春秋無惡于季子也然曰如陳塋原仲所謂以微
罪行也

冬祀伯姬來

左傳云歸寧也有常禮矣有當來之禮而後有不

當來之禮當來者先王所以體父子之親不當來者先王所以謹男女之防載馳之詩雖有至情不敢越禮文姜違之遂以階亂有國家者亦致謹于閨門之內而已矣伯姬父母在歸寧禮也既有歸寧之禮非有不得伸之慈愛胡爲乎爲洮之會乎書曰杞伯姬來所以正洮之失也胡傳乃謂不當來其又以行禮爲譏乎

昌慶來逆叔姬

杜云慶大夫叔姬莊公女卿自爲逆則稱字

杞伯來朝

公會齊侯于城濮

衛地

二十有八年春王三月甲寅齊人桓伐衛衛人及齊

人戰衛人敗績

左傳王使召伯廖賜桓公命曰請伐衛以其立于類也齊人伐衛戰敗衛

師敗之以工命取幣而還

伐書曰重王命也戰書及志衛惡也奉王命以討有罪衛不悔禍悍然逆戰強侯無君又不獨一射王之鄭莊已也戰而敗之折逆侯之氣伸天子之威桓于是有功于王室矣前此隱桓以來後此文襄繼伯二百四十二年之間所未有也然書齊人

而不以爵舉者何也衛之罪重當執之歸命于天子以聽斧鉞非止薄伐而已視古者六師移之之職有所未盡焉耳此春秋責備賢者之意也胡氏謂稱人爲將卑師少失之桓方翼戴天子敢不親行乎左傳謂取賂于衛楚人囚印莖而獻諸秦鄭人取貨于印氏以請之子產曰不獲受楚之功而取貨于鄭不可謂國鄭人弗從秦人不予更幣從子產而後獲之彼偏邦之夷也猶知愛國體而避貨賂之名桓糾伯之英主也豈其知反出秦人下

戰必不然矣

穀梁曰衛稱人以敗不以師敗于人也按泓之戰宋襄以師敗于楚人艾陵之戰齊國書以師敗于吳安在不以師敗于人邪若以吳不稱人爲辭然則例所謂舉號者又進于稱人矣凡此類皆拘例之過也

夏四月丁未邾子貜卒

女公適除立

秋荆伐鄭公會齊人宋人救鄭

林云會諸侯始此

入春秋以來諸侯連兵伐國者有矣未有能倡義

而救之者也諸侯相救于是乎始于是將奔桐邱之鄭獲安其處屢入中國無忌之楚烏集于幕矣子曰民到於今受其賜有以也夫

冬築郿

有因修築以救饑民者是或一道未可盡譏也

大無麥禾

蘇穎濱曰書于冬者五穀畢入計食不足而後書也是歲未嘗有水旱螟螽之災而書大無麥禾何也劉向春秋說曰土氣不養稼穡不成也胡傳歸

月不與事
六二
咎于莊公惟宮室臺榭是崇是飾此責人君則可
非經之本旨也大無麥禾是天時之不收卽不修
用猶大無麥禾也

臧孫辰告糴于齊

葵邱之令曰無遏糴於此猶想見古諸侯恤鄰之
義焉

二十有九年春新延廩

穀梁云言新有故也有故是可以不新也去年大
無麥禾至乞糴于鄰而猶爲此無益之舉是亦不

可以已乎

夏鄭人侵許

秋有蜚

冬十有二月紀叔姬卒

紀滅矣而卒紀叔姬叔姬紀之媵也而何以卒之
也存亡之際節義所貞聖人隱焉一叔姬足爲春
秋重人不在大也記曰君子表微叔姬以一媵女
而著于春秋于是而知節義之于人甚也

城諸及防

傳言時則時也諸家必以爲譏然則國家可無城乎

三十年春王正月

夏次于成

胡傳次公穀俱有無字

救鄆也不能救何次次而不能救損威已大趙汭前謂莊能師能師者固如此乎不書公不書師以爲無所事事書之也杜以將卑師少直言次亦未是

秋七月齊人降鄆

正義以爲附庸小國

次于成救鄆也次者自次降者自降齊不但無鄆并無魯矣

八月癸亥塋紀叔姬

姬以去年十二月卒至今年八月始塋婦人之失所未有如姬之甚者

聖人憫執節守義窮死而無告者故書之詳以叔姬之義至今在也

九月庚午朔日有食之鼓用牲于社

無警戒之實意故不知用牲及于社之失而遂習

爲恒例

冬公及齊侯遇于魯濟

魯地

左傳謀山戎也以其病燕故也降鄣則不顧魯伐山戎則與之謀是直役使之而已矣

齊人桓伐山戎

左傳病燕故也

燕有罪燕之士民何罪狄以不治遂入而滅邢滅衛若使戎肆其惡而病燕不已必且漸而蚕食諸國將受其害者不獨一燕矣况齊燕比鄰又爲切膚之患邪故燕之罪不可宥而戎決不可不治治

燕治戎自是兩事未可以燕之故遂併戎不問也
然而書人何也詩云薄伐獫狁至于太原王者之
治夷狄威之而已不窮兵也齊師伐戎至于迷失
歸途問知于老馬不已甚乎

二十有一年春築臺于郕

公羊曰何譏爾師民之所激浼也

夏四月薛伯卒

築臺于薛

魯地

六月齊侯來獻戎捷

諸侯有相朝之理獻捷于魯以示自等于列辟欲以辟天子也蓋劍伯之始立威不得不嚴故執鄭詹者所以懾人渙之人心伯成之後持已不嫌少降故獻戎捷者所以敦會盟之同好然而非禮矣書曰齊侯來獻戎捷言過也雖然視之文襄之僭蔑諸侯而凌天子孰得孰失乎胡傳執獻之一字謂以下奉上爲聖人抑邊功淺之乎視桓矣獻者相遺之恒辭耳晉魏錡謂楚潘黨曰獸人勿乃不給于鮮敢獻于從者亦可謂以下奉上乎

秋築臺于秦

魯望國爵位土地不後于齊齊方修伯主之業而
魯志日頽不聞有愧厲之意方且恣于遊觀山戎
之捷方來而築秦之役再舉所謂自棄者不可與
有爲魯之謂矣一書再書三書蓋深病之不止爲
輕用民力已也

冬不雨

三十有二年春城小穀

杜齊邑

傳曰爲管仲也輔仲納糾者莊也殺糾囚仲者莊

也媚仲城穀者莊也一人之身忽親忽怨倏倏
恭千乘之國爲齊大夫役春秋如莊何哉小穀不
書齊醜之也

夏宋公

桓

齊侯

桓

遇于梁邱

穀

梁傳

梁邱

齊八百里

間去

齊八百里

齊八百里

齊八百里

齊八百里

齊八百里

左傳曰齊侯爲楚伐鄭之故請會于諸侯宋公請
先見故遇然謀楚會諸侯之事經傳不見何也不
成會不成謀也此桓之深機也時齊之力未能及
楚而諸侯之志未肯協從故托遇宋爲名以沉其
機若曰此宋志云爾語云守若處女桓公有焉蓋

自是而齊不忘楚矣春秋善桓之心故書之如此
齊未能及楚而爲遇以掩其請會之迹魯未能及
齊而輕爲救鄆之次何邪有謀無謀之分于此顯
矣

秋七月癸巳公子牙卒

左傳公孫問後于叔牙牙日慶父材問于季友對曰臣以

死本般酈伯叔于鍼
巫氏是爲叔孫氏

君子諱國惡可以卒則卒之而已

八月癸亥公薨于路寢

一成之地可以立國一旅之眾可以強兵魯有千

乘之勢而莊不威齊有殺父之讐而莊不怨其性
與人殊也微獨不讐齊而一生畢力于齊爲之主
婚爲之娶女爲之伐衛爲之受俘爲之園廊齊專
廊而不耻爲之納糾齊殺糾而不顧何愛于襄而
屢縱姜氏入齊何德于桓而特爲管仲城穀顛倒
悖亂殆不復知有羞惡之事治之以天子之法莊
其在所必誅乎

冬十月己未子般卒

公羊君有稱世子君薨稱子某
既葬稱子踰年稱公子般子野

未葬故稱名子
惡既葬故稱子

胡傳責莊違時不婚是矣而謂般爲孟任所出胡能有定然則嗣位者豈盡嫡出乎且莊以二十四年婚于今八年嫡子不立安得盡歸咎於違時國家之法有嫡立嫡無嫡立長爲人臣者主少國疑靖共不貳故可以托六尺之孤而措國家於泰山磐石之安但是丁卯子同誰非大君骨血必以孟任爲嗣子病是開孽子危疑之漸啟擁戴窺伺之心何可訓也

公子慶父如齊

狄伐邢

林狄人伐之始

戎狄爲中國患浸尋之極至於滅國不知當日中國諸侯何以不能治齊桓爲伯主不知何以坐視而竟不爲之所也胡傳隱二年鄭人伐衛訓字例曰聲罪致討曰伐如狄者亦可謂之聲罪致討乎故知侵伐敗戰諸義訓字則可必於字中取義則遠矣吾所以不滿於胡傳譏詐勝者此亦一徵矣左傳是年有神降於莘賜虢公士田史嚚曰虢必亡矣國將興聽於民國將亡聽于神神聰明正直

而壹者也此信道之言也信道篤者觀於原本之地雖有土田之命不可惑也是故知人事者以人事而知神明者以神明